

Utoqqalinersiat pillugit malittarisassat allanngortinnissat pillugu apeqquteqaat aallaavigalugu oqallinnissamik siunnersuut, taamaasippat utoqqaat utoqqalinersiallit amerlanerit sulisinnaalissammata.

(Inatsisartunut ilaasortaq Niels Thomsen, Demokraatit)

Akissuteqaat

(Isumaginninnermut Naalakkersuisoq)

Inatsisartunut ilaasortap Niels Thomsenip utoqqaat utoqqalinersiallit amerlanerit sulisinnaalersinnaanngorniassammata utoqqalinersiat pillugit malittarisassat allanngortinnissat pillugu apeqquteqaat aallaavigalugu oqallinnissamik siunnersuutaanut attuumassutilimmut qujanaq.

Siunissami utoqqaat amerlanerulissapput tamatumunngalu peqatigitillugu sulisinnaasut ikilissallutik. Siunnersuuteqartup utoqqaat atorluarneqanngitsutut inuiaqatigiinnilu iluaqutigineqartariaqaraluartutut isigai, taamaattumillu suliunnaarnissamut ukiussarititaasut eqqartorneqartariaqarsoralugit. Utoqqaat sulinikkut atorluarneqarsinnaanerit siunissamilu atorluarneqarnerusariaqarnerit Naalakkersuisut isumaqataaffigaat.

Taamaattumik Kalaallit Nunaata siunissami sulisussanik annertuumik pisariaqartitsiuarmissaanik naliliineq aallaavigalugu sulisinnaasut sapinngisamik sivisuumik sulisoriinnarnissaannut kajuminnarsaanissaq naapertuutissaq. Amerlanerusut suliffeqarnermit tunuariartuaartarnissaannik taamaalillunilu sulisut amerlisinneqarnissaannik qularnaarissutaasinnaasumik aningaasaqarnikkut kajuminnarsaanissaq naliliiffigineqartariaqarpoq. Tamatumunnga atatillugu ilaatigut utoqqalinermit pensionisiat pillugit inatsit misissorneqassaaq.

Aammattaaq siunnersuuteqartup eqqaavaa utoqqalinermit pensionisiat nammineq aapparissalluunniit isertitai apeqqutaatillugit annertussuseqartariaqanngitsut, utoqqalinermit pensionisiaqarsinnaatitaalersunut tamanut tunniunneqartariaqartut.

Tassunga atatillugu malugeqquvara, utoqqalinermit pensionisialik ullumikkut isertitaqarnissamut qulakkeeriffigineqareermat, tassami utoqqalinermit pensionisialik nammineq isertitaqanngitsut pensionisialimmut kisimiittumut tunngaviummik tunniuttakkat annerpaartaasa 50 %-iilik pisinnaatitaajuaannarmat, aapparissap inooqatigisalluunniit isertitai akileraaruteqaataasussat apeqqutaatinnagit.

Naalakkersuisut ilanngullugu malugeqqussavaat isumaginninneq pillugu inatsit innuttaasut tamarmik imminnut ilaqtaminnullu pilersuisussaataitanerannik - pilersogatigiittussaannermit tunngaveqarmat. Pilersogatigiittussaannerup kingunerat tamatta qanigisatsinnut akisussaaffeqarnerput.

Apeqqutaavoq pilersogatigiittussaataitanerup tunngaviumut atorunnaarsinneqarnissaanut piffissanngorsimanersoq – aamma maanna aningaasaqarnerput aallaavigalugu. Siunnersuut pensionisiaqartitsinermit annertussuserititat atuuttut aallaavigalugit naatsorsuigaanni

pensionisiant ukiumut 85 millioner kr.-it missaannik Nunatta Karsianut aningaasartuutaanerulissaaq.

Siunissami pensionisiaqartitsinissamik pilersaarusiornermi ungasinnerusoq eqqarsaatigalugu aaqqissuussinikkut suliasat eqqarsaatigineqassapput. Tamatumunnga peqatigitillugu kalaallit atugarissaariaasiat aallaavigineqassaaq, tamatumani sulisoqarluartillugu pisortat aningaasaqarnerat iluaquserneqartarmat, taamaaliornikkut isumaginninnermut aningaasartuutit sipaarneqartarmata akileraarutiniillu isertitaqarnerulertoqartarluni.

Suliffeqarnerup nalaani utoqqalinissamut katersisalernissap nukinngunneqalernissaa inuiaqatigiit aningaasaqarnerannut inuillu namminneq aningaasaqarnerannut pingaaruteqarpoq, taamaalilluni utoqqaat amerlanerusut tamakkiisumik ilaannakortumilluunniit imminnut pilersorsinnaalissallutik. Imminut pilersorneq suliffeqarnermi pensionisianeersinnaavoq, nammineq aaqqissuussamik pensionisianeersinnaalluni aamma isertitanit allaneersinnaalluni. Pensionisiassanut katersilluarneq taamaalillunilu utoqqaanermi imminut pilersornissamut tunngavissaqarnerulerneq pisortat utoqqalinermi pensionisiant aningaasartuutaannut oqilisaassiviussapput.

Taamaattorli siunissami utoqqalinermi pisortanit pensionisiaqartitsinissamut suut aallaavigineqassanersut isumaliutigissallugu pingaaruteqarpoq. Akileraartarneq Atugarissaarnerlu pillugit Isumalioqatigiissitap ilaatigut suliasaraa atugarissaarnitta siunissami qanoq ilusilersorneqarnissaa, minnerunngitsumik siunissami utoqqaat amerlanerulernissaa eqqarsaatigalugu.

Apeqquteqaat aallaavigalugu oqallinnissamut siunnersuummi tassani pingaarnertut siunertaavoq utoqqaat sulisinnaasut qanoq ilillutik sapinngisamik sivisuumik suliffeqaannartinneqarnissaannik eqqartuinissaaq. Tamanna pillugu Inatsisartuni isumassarsiorfiusumik oqallinnissaaq Naalakkersuisut qilanaaraat, tamatumani aamma upernaakkut ataatsimiinnermi siusinnerusukkut oqallinneq malitseqartinneqassammat.